

# FITA yana leta nagona

Hida leta Fita tovetumagana fafali tulina tulina agaidiya vaita hawahawala amine himiyami-ma agaidiya gi'etoladina. Fafali-dina adi egana giyakahina. (1 Fita 1:1) Tu Fita tauna melala sa'eyana givewagana Babiloni ma againe gimiyami tu gi'etoladi. Melala-mo'ena Loma tu Loma kabemani kalivadi Kelisitiyani hive'umagigiyedi fa'ina, mena melala kikaiwabuna egana sevasevauyana amine giyakahina. (I Fita 5:13)

Badi tovetumagana vita tulina tulina Keliso ana muliya fa'ina hinuhagana, ada Fita nuwanuwana ase'asedi ginakivevatuna be higa yadi wavemwamwala hina'atufefa'ila. Adi kibababala ana nuwanuwa kadu Yesu yana atufefa'ila vita agaidiya ada yana yewa'ela fa'ina nuwadi gitalafolefolena be medema ana nuwa-nunauya againe faiwala hinanuhagana. Kadu gilugageyedi be dewa mahamahalina Keliso ana tomuliyaga gilubodadi-ma amine hinahuluhuluva. Leta dobona hidede amine.

Lusiule. 1:1-2

Yaubada yana kibababala fa'ina nuwadi gitalafolena. 1:3-12

Dewa mahamahalina fa'ina gilugageyedi. 1:13–2:10

Bona'abi tovetumagana adi lauboda, kabemani agaidiya 2:11-17,  
tove'agetoga yadi tovehimeya agaidiya 2:18-25, vevine  
moganediya agaidiya. 3:1-7

Keliso ana muliya fa'ina ve'umagigi ana nauhaga ma. 3:8–4:19

To'ekelesiya adi lau'age tulina tulina. 5:1-11

Lukafoi tulina tulina. 5:12-14

**1** <sup>1</sup>Yo siule omi Yaubada giluwafami be hida babi againe hawahawala amine wamimiyami-ma kalivai-mina. Iya Fita Yesu Keliso yana kabu gavaina be gave'afositolo-ma yami leta ga'etoladina be wana'itana. Badi Yesu againe hivenibaina-ma hiwavimi be mali fafali agaidiya wa'abinauna, fafali-dina Fonitasi, Galesiya, Fafadosiya, Esiya kadu Bidiniya. <sup>2</sup><sup>a</sup>Tuwai-lokalokana Yaubada Tamada giluwafami kadu givegide-vagahimi ada Alu'aluwa Mahalina yana ihagihagi againe mahamahalimiyao wamimiyami. Hidedemi giluwafami be higa Yesu Keliso bonana wana'abi'abina ada Bana dayagine ami bwanene ginakolana.

---

<sup>a</sup> 1:2 2Te 2:13; Ef 1:4; Hi 12:24

Yaubada yana nuwadoga kadu yana aseniwalova ana ayauna againe wanatutuveguvegulami.

**Yesu Keliso againe kanavetumaganadona yo  
ada kibababala kananuhagana.**

3-4 <sup>b</sup>Keke gavana fa'ina tu Yaubada Bana yada Kaiwabu Yesu Keliso Tamana ana egana kanakilakahina, kanakilakahi-mo'ena Yaubada gihinekalikaliyeda fa'ina, Yesu Keliso alikeya gisivemididini-yo katubuga-havagi be yawaida ivaguna kanuhagana. E, yada abaluve'avina miyamiya-vagahina kavaina, ada Yaubada ada du'u gikidewedewena be lobameya gi'ita'itave'avina. Mena du'u-nadi ana ita yamumunaga, keke ginakoyo kadu keke ginahavaini. 5 <sup>c</sup>Yesu Keliso wavetumaganena fa'ina Yaubada yana faiwaleya giyavayavami ada ginanunauwena tu gaitoma moya'aidi koyodi agaidiya ginakibababaleda. Ada ahe gikidewadewa-vagata be aimo tova ana abalauyabu againe kibababalai-nadi gina'ivemogatalina. 6 <sup>d</sup>Medema fa'ina wanavemwamwala lakahina. Tova hidevama ka'i gilubodami be badi Yesu hivenibainena-ma yadi ve'umagigi ana vita tulina tulina agaidiya ase'u'aulolo wa'aya'ayaunena. Tu mena vitai-dina keke hinaduva-vagata. Tova hidevama wa'ase'u'aulolo nonogana ami du'u Yaubada gikidewedewena be walulubodena-ma fa'ina wavemwamwala. 7 Yaubada mena vitai-dina agaidiya gihawahegemi be higa yami vetumagana ana galuvaluva againe ka'i velemo'ena o ka'i keke ma ginahalamanena. (Wa'ita, kaliva gola babiya hiyalana digo wayogona buye hivetagovina be gi'ulafuwana againe gola-mo'ena avaekeya gida tu momolu hihegena.) Gola ana kaiwabu lakahina tu gaitoma havahavaina. Kaliva gola ai againe hive'alave'uve'una amine, meda Yaubada yami vetumagana gola gikaiwabuhegena-ma vita agaidiya gicaluvaluvana ka'i velemo'ena ma kabu'avane ginalakayemu. Ada aimo Yesu yana yewa'ela ana toveya yami vetumaganadona fa'ina Bana Yaubada ginahawaveyamumuyemi kadu ami egana ginakilakahina kadu ginakivekaiwabumi. 8 <sup>e</sup>Boi Yesu Keliso keke wada'itani nonogana nuwanuwami lakahina Bana'e. Kadu tova adamoya keke wada'ita'itani nonogana Bana againe wavetumagana kadu wavemwamwala-mo'a, yami vemwamwala gi'ive'alikami be keke tamo gavadi amifaiweya wanagaheyeni. 9 Gavadi-yo wavemwamwala-mo'a? Me yami vetumagana guwana higa alu'aluwami ana kibababala wanunuhagana.

<sup>b</sup> 1:3-4 1Fi 1:23; Kl 1:12    <sup>c</sup> 1:5 Kl 3:3-4; Af 20:32    <sup>d</sup> 1:6 1Fi 5:10; Yob 23:10; Ye 1:2-3  
<sup>e</sup> 1:8 Yo 20:29

**Yaubada bonana ana to'awatalatalaina Keliso yana  
kibababala fa'ina higaheye-vagahina.**

<sup>10</sup>fTuwai-mo'ena Yaubada bonana ana to'awatalatalaina mena ami kibababala ana nuwanuwa fa'ina yadi wa'idibumuhiga hilele-hagihagiyena, ada Yaubada yana nuwadoga muliya ginavelemi-ma fa'ina higaheye-vagahina. <sup>11</sup>gKeliso Alu'aluwana giluvaiyedi-yo gihawaveveledi gigayo, “Aimo Yaubada yana Tovegida vita tulina tulina ginanuhagana tu muliya ginakaiwabu-mo'a.” Ada badi to'awatalatalaina gava tova kadu gavaiya'amine mena gaitomai-dina ginayemu-ma ana halamana hilelelena. <sup>12</sup>hYaubada badi agaidiya gihawavemogatala keke vaita taudiyao adi veluga au omi ami veluga fa'ina hi'awatalatalaina. Ada gaitomai-dina fa'ina higaheye-vagahina amanadi valeyana kibababala ana Venuwa'ata Yamumuna ana tolaumamala agaidiya wanogalina. Yaubada Alu'aluwa Mahalina gi'iveninisena, lobama amine gihobu'ela be badi tolaumamala giluvaiyedi-yo agaimiya hi'awatalatalaina. Badi Yaubada yana tovenuwa'ata lobameya himimiyami nonogana ami kibababala ana nuwanuwa fa'ina halamana hilelele-hagihagiyena tu higa-wayoga.

**Yaubada mahamahalina fa'ina, omi kaliva  
mahamahalimiyao amine wanahuluva.**

<sup>13</sup>iTu omi kibababala ana nuwanuwa ahe wahalamanena be yawaimi ivaguna wanuhagana fa'ina, nuwami wanakidewedewena be wanavanevanenega. Kadu taumiyao yami nuwanuwa wanahawatana. Bana Yaubada yana nuwadoga againe wanaluluve'avina-mo'a aimo Yesu Keliso ginayewa'ela ana toveya ginavelemi-ma nuwadogainadi. <sup>14</sup>jTuwaina Yaubada keke wadahamaneni au fanifanimiyao wamimiyami be nuwanuwa ita'italuvadigana agaidiya wahawahegemi. Tu tova adamoya Yaubada wahalamanena fa'ina, keke mena nuwanuwa koyodi amine wanahuluhuluva au we'owe'o dibudibumuhigidiyao amine Tamami fa'ine wanahawahegemi. <sup>15</sup>kE, Bana giluwafami-ma kaliva mahamahalina amine, gilubodami be yami dewa moya'aina agaidiya mahamahalimiyao wanahuluhuluva. <sup>16</sup>lMeda tuwaina Veyao Tuwaina ana bukiya Yaubada gigahe gigayo,

Iya mahamahaliku fa'ina, gilubodami be omi mahamahalimiyao wanahuluva.

<sup>17</sup>mKadu'e, Yaubada wave'o'olena againe Bana'e wahawavetamanena, ada Bana kaliva moya'aida yada dewa fa'ina ginavedewayaugida ada

---

f 1:10 Ais 53:1-12    g 1:11 Lu 24:26-27    h 1:12 Md 13:16-17; Ef 3:10    i 1:13 Lo 12:2  
j 1:14 Lo 6:19; Ef 4:17-18    k 1:15 2Ko 6:16-18, 7:1    l 1:16 1Veh 19:2    m 1:17 2Veh 10:17

yana laufata leleleya. Ka'i haghagina digo, kadu haghagina. Ka'i koyona digo, kadu koyona. Medema fa'ina hidei babiya aimo hawahawala amine wanamiyami ana aitueya tova moya'aina yami wamatauta Bana'e Tamami wanave'amohimohinena.

<sup>18-19</sup> <sup>r</sup>Tuwaina dewa uyu'uyuyuna keke waguwana bwanenemiyao hi'alavedavedamami-ma wamuliyena. Ada dewai-nadi fa'ina yogoyogonimiyao wamiyami tu ahe wahalamanena Yaubada mena dewai-nadi againe gitutuehobumi, ada fata gisena-ma keke gaitoma havahavaina vaita lokolokofou o mani amine. Au Keliso dayagina gaitoma kikaiwabuna againe gitutuehobumi. Sifi kabi'ona wowona tubuyamuyamumuna keke tamo ana ki'ona abaveyao fa'ina hisena amine, meda Keliso mahamahalinaga dayagine gitutuehobumi. <sup>20</sup> Yaubada aimo babi keke gidabubuni tu Bana Keliso ami kibababala fa'ina givegide-vagahina, tu tova adamoya higa hida tova havahavaina againe omi fa'imiya gi'ivemogatalina. <sup>21</sup> Bana amihinafeya gihobu'ela fa'ina Yaubada againe yami nuwave'avina wasena, Bana alikeya gisivemididina be gikivekaiwabuna amanadi, ada au Yaubada againe wavetumagana kadu waluluve'avina.

<sup>22</sup> <sup>o</sup>Au Yaubada yana nuwanuwa velemo'ena wa'idibumuhigena fa'ina, alu'aluwami ana bwanene wakola-yo badi Yesu yana yo'ogaga agaidiya buye wavetobohiyana-ma agaidiya yami nuwanuwa wasedonena. Medema fa'ina yami wa'asehawahega velemo'ena buye wanave'ahawahawahega lakahina. <sup>23</sup> <sup>p</sup>Fa'ina Yaubada bonana miyamiya-vagahina againe watubuga-havagi ada yawaimi ivaguna bonai-nadi againe give'inuba. Tamamiyao hi'ivetubugimi-ma havahavaidiyao tu Tamami bonana againe yawaimi ivaguna wavaina medema miyamiya-vagahina.

<sup>24-25</sup> <sup>q</sup>Meda gahe sa'eyana Yaubada bonana miyamiya-vagahina fa'ina Veyao Tuwaina ana bukiya gidadauda gigayo,

Kaliva moya'aidi vaita isisi'lu amine,  
yadi kaiwabu vaita ana falafalawasi  
yadi kaiwabu amine.

Isisi'lu giboubou kadu ana falafalawasi gi'a'akukuwana,  
atu Kaiwabu bonana giduva-vagata.

Ada mena bonai-nadi Yaubada yana kaliva agaimiya gilumamalena.

### Ide vaita Yaubada yana manuwu amine.

**2** <sup>1</sup> <sup>r</sup>Tu omi Yaubada natuneyao fa'ina, nuwanuwa koyodi matatabudi wanavenikohiyedi. Auwe ve'alololo ve'uma'ala ga'luma'uma

<sup>n</sup> 1:18-19 1Ko 6:20; Yo 1:29   <sup>o</sup> 1:22 Yo 13:34   <sup>p</sup> 1:23 Yo 1:13; Hi 4:12  
<sup>q</sup> 1:24-25 Ais 40:6-8   <sup>r</sup> 2:1 Ef 4:22; Ye 1:21

veyaina tulina tulina, auwe auwe-mo'a. <sup>2</sup>Fwefweya ivagudiyao tova moya'aina hihuhuhu amine, omi Yaubada bonana againe tova moya'aina wanahuhuhu wananunauwena tu ami kibababala ana nuwanuwa againe wanave'asevatu. <sup>3</sup>Meda gahе sa'eyana Veyao Tuwaina ana bukiya gidadauda gigayo,

Kaiwabu yana nuwakabubu wa'aluvaluvani.

<sup>4-5</sup>Wa'ita, yada Kaiwabu vaita Yaubada yana manuwa ana ogola miyamiya-vagahina amine. Badi kaliva hikilowena vaita medema ogola-kawowo tu Yaubada giluwafana fa'ina Bana gaitoma kikaiwabuna. Kadu omi vaita ogola miyamiya-vagahimiyao amine, ada Kaiwabu againe wanayemu wanahawahegemi be Yaubada yana manuwa againe ginave'etohavihavimi. Medede againe wanavetofaisewa higa vaita abaveyao ana tofaisewa mahamahalidiyao amine wanafifaisewa. Yesu Keliso yana veluga againe alu'aluwami ana abahawahega Yaubada againe wana'ali'aliyena be nuwana wanakivedigagina. <sup>6</sup>'Meda tuwaina Yaubada Keliso ana lauwafa fa'ina Veyao Tuwaina ana bukiya gigahe gigayo,

Wa'ita, yaku melala Saiyoni againe

ogola sa'eyana gaktivemididina,

ogolai-nadi nuwavaivaina

holili'abi fa'ina galuwafana.

Ada hai kaliva Bana againe ginavetumagana

medema keke ginavetumagana-wayoga.

<sup>7</sup>Umi Yesu againe wavetumagana-ma kalivai-mina matamiya Bana'e vaita yami lokolokofou. Atu badi gaveyao keke hidavetumaganeni-ma matadiya au vaita gaitoma-kawowo. Meda gahе sa'eyana Veyao Tuwaina ana bukiya gigayo,

Ogolai-nadi to'aiyogona hikilowena medema giveholili'abi.

<sup>8</sup>Kadu gahе sa'eyana ma gigayo,

Hida ogola ma abatutumadumadu kadu ababe'ube'u.

Yaubada bonana hidibutoyogena fa'ina hitutumadumadu be adi matahiwadi hinuhagana tuwai-mo'ena Yaubada givehimeye-vagahina amine.

### Ide Yaubada yana yo'ogaga giluwafada amanadi.

<sup>9</sup>Wtu omi'iyao ma kaliva vevine luluwafamiyao, omi Keliso Tokaiwabu ana hawadavadava ana tofaisewa, omi yo'o mahamahalimiyao, e omi Yaubada yana yo'ogaga kalivai-mina. Ami lauwafa gavana ana inuba? Me higa yami wadavadava yana gugai hagihagina kaliva matadiya wanalukahihiyena, omi uyuyuya wamiyami tu gikovami be Tauna yana

<sup>s</sup> 2:4-5 1Ko 3:11; Lo 12:1    <sup>t</sup> 2:6 Ais 28:16    <sup>u</sup> 2:7 Sam 118:22    <sup>v</sup> 2:8 Ais 8:14

<sup>w</sup> 2:9 Yem 19:5-6; Ais 9:2; Ef 5:8

mahalina yamuyamumu-'owogina againe givega'aulemi-ma kalivai-mina. <sup>10</sup>xTuwaina omi kaliva-kawowo keke ami waegana, tu tova adamoya omi Yaubada yana kaliva. Tuwaina keke hinekalikali wadanuhagani, tu tova adamoya Yaubada yana hinekalikali ahe wanuhagana.

**Ide Yaubada ana agetoga bona'abi againe kanamiyami.**

<sup>11</sup>yTobohiya'ase'asekweyao, omi vaita hawahawala kadu wakawaka hidei babiya amanadi agaimiya ganagahe. Gagahevagadonemi be higa wowomi ana nuwanuwa ita'italuvadigana agaidiya keke wanahawahegemi. Mena nuwanuwai-dina alu'aluwami nibaineyao, koyona againe gitaitaimi. <sup>12</sup>zGilubodami be badi Yaubada keke hidahalamaneni-ma hinafadiya yami dewa haghigagi-mo'ena wanaseseyemaunena. Ka'i omi vaita tokoyona amine hinahawavekoyoyemi, au aimo Yaubada ide kaliva ginavedewayaugida ana toveya yami dewa haghigagi-mo'ena boi waseyemaunena-ma hina'itayakahina be Yaubada ana egana hinakilakahina.

<sup>13-14</sup>aKadu'e, Kaiwabu nuwanuwana bona'abi fa'ina, hida babi ana tovehimeya moya'aidi yadi vehimeya wana'ita'itave'avina. Kabemani lakahina kadu tovehimeya kabi'odiyao vaita Bana loseyanineyao fafali tulina tulina agaidiya gisedi be higa tokoyona hinavematahiwadiyedi kadu toyamumu hinahawaveyamumuyedi-ma tovehimeyai-dina bonadi wana'abi'abina. <sup>15</sup>bFa'ina Yaubada nuwanuwana omi tobona'abi yami dewa yamumuna againe badi totagakulu Yaubada hifaniyena-ma yadi awalava wanavetufagolohina. <sup>16</sup>cTuwaina yami koyona fa'ina yogoyogonimiyao wamiyami tu Yaubada giyaumi. Au kaliva yauyugimiyao amine wanamiyami tu keke wanagahe wanagayo, "Yaubada yaku koyona giyawelini-yo giyauku fa'ina akufaiweya tauku yaku nuwanuwa amine ganahuluva." Wona velemona Yaubada giyaumi tu keke mena Yaubada ana egana ana aiyakata againe yami dewa koyona wanakevani. Au Yaubada yana nuwanuwa amine wanafifaisewa vaita omi Bana ana agetoga amine. <sup>17</sup>Kaliva moya'aidi wanave'amohimohinedi. Badi tobohiyamiyao Yesu againe hivetumagana-ma yo'o-dina agaidiya yami nuwanuwa wanaseusena. Yaubada wanamatausena. Kabemani lakahina wanawowomumuyena.

**Keliso vita tulina tulina agaidiya gi'atuvefa'ila-ma yada aba'ita.**

<sup>18</sup>dTu omi tove'agetoga ami tovehimeya bonadi wana'abi'abina be tova moya'aina wanawowomumuyedi. Keke vaita badi tonuwakabubu kadu tobonabikabika gagana au badi to'agodadaga buye wanawowomumuyedi.

x 2:10 Hos 1:10; Lo 9:25 y 2:11 Ga 5:16-17,24 z 2:12 Md 5:16 a 2:13-14 Lo 13:1-7  
b 2:15 1Fi 3:15-17 c 2:16 Ga 5:13 d 2:18 Ef 6:5-7

<sup>19</sup>Ka'i keke tamo gavadi koyona wadafaisevani be ve<sup>l</sup>umagigi wanuhagana tu Yaubada wanuwenuwena be wa<sup>l</sup>atufefa'ila, au medema dewa haghigagina Yaubada matane. <sup>20</sup><sup>e</sup>Ka'i yami dewa koyona fa'ina munugakoyokoyo wanuhagana tu wana<sup>l</sup>atufefa'ilena, hai ami hawaveyamumu? Keke. Atu ka'i yami dewa haghigagina fa'ina hinave<sup>l</sup>umagigiyemi tu wana<sup>l</sup>atufefa'ila, au medema dewai-nadi fa'ina Yaubada ginahawaveyamumuyemi. <sup>21</sup>Atufefa'ila vita agaidiya fa'ina Yaubada giluwafami. Wa'ita, Keliso omi fa'imiyi vita gi<sup>l</sup>atufefa'iledi ada aba'ita givelemi be higa Bana amine wanahuluva.

<sup>22</sup><sup>f</sup>Keke tamo koyona gidafaisevani. Keke tamo fwaya awane gidayemu-yo kaliva hidanogalini.

<sup>23</sup><sup>g</sup>Kaliva hi<sup>l</sup>ihawadamanena againe keke awadi gidafatani. Badi hive<sup>l</sup>umagigiyena againe keke gidahawavematauhidi. Au yana nuwanuwa matatabuna Yaubada nimane gisena, Bana Tolaufata tunutunugina amanadi. <sup>24</sup><sup>h</sup>Keliso Tauna yada koyona ana laufata giwahina be kelose againe gi<sup>l</sup>alika higa vaita ide nuwanuwa koyodi kanavenikohiyedi-yo dewa koyona agaideya ginahavai-mo'ena. Bana ana ki'ona againe ide kayamumu. <sup>25</sup><sup>i</sup>Tuwaina omi vaita sifi hinunaufani-ma amine Yaubada yana eda wafaniyena tu tova adamoya ami Tolugolagola againe wahagavilami Bana alu<sup>l</sup>aluwami ana To<sup>l</sup>itave<sup>l</sup>avina amanadi.

### Vavinemiyao be moganemiyao.

**3** <sup>1-2</sup><sup>j</sup>Tu omi vevine vetuvetumaganimiyao Kaiwabu yana vehimeya amine yami wawowomumu moganemiyao agevavadiya wanamiyami. Hidede amine agevavadiya wanamiyami be higa ka<sup>l</sup>i moganemiyao tufoidi keke Yaubada bonana hidavetumaganeni digo, mena yami huluva yamumuna againe wananuwa<sup>l</sup>atuyaudiyedi be Yaubada againe hinavetumagana. Keke vaita yami gahegahe againe wananuwa<sup>l</sup>atuyaudiyedi, au yami huluva yegayegana kadu yami ve<sup>l</sup>amohimohina hina<sup>l</sup>itani-yo Yaubada againe hinahagaviladi be hinavetumaganena. <sup>3</sup><sup>k</sup>Ami aiwaka ana ita inubana keke wowomi ana vaigau againe wanunuhagani, higa vaita u<sup>l</sup>umi wana<sup>l</sup>amoni o ka<sup>l</sup>i odo<sup>l</sup>odo, mokula fatana lakahina wanavelakavini o ka<sup>l</sup>i doki nuwavaivaina wana<sup>l</sup>oseni-yo kaliva matadiya wanave<sup>l</sup>i<sup>l</sup>aiwaka. <sup>4</sup>Au ami aiwaka inubana ma nuwahunagemiya. Nuwami umaumana kadu niwaniwalovina amine wanahuluhuluva. Mena nuwahunagemi ana vaigau au fatana lakahi-mo'ena Yaubada matane, kadu gaitoma miyamiya-vagahina. Atu wowomi ana vaigau ma aimo ginayawowola. <sup>5</sup>Fa'ina badi vevine tuwai-mo'ena himiyami be Yaubada againe hihawahegedi,

<sup>e</sup> 2:20 1Fi 4:14    <sup>f</sup> 2:22 Ais 53:9    <sup>g</sup> 2:23 Ais 53:7; Lo 12:19    <sup>h</sup> 2:24 2Ko 5:21; Ais 53:5-6  
<sup>i</sup> 2:25 Yo 10:11    <sup>j</sup> 3:1-2 Ef 5:22-24; 1Ko 7:12-16; Ta 2:4-5    <sup>k</sup> 3:3 1Ti 2:9-10

ada yana wonadabadaba guwana fa'ina hilulauboda-ma hidede amine adi aiwaka fa'ina taudiyao hi'hagihagiyedi, au moganediya adi wawowomumu agevavadiya himiyami. <sup>6</sup>Meda anafaiweya Sela moganedi Abelahamo hi'l'idibumuhigena be hivewagana yadi kauve'a. Ada ka'i omi'iyao wanahuluva yamumuna ada keke tamo gavadi fa'ina wanamatauta, au omi vaita Sela natudiyao nimadi wavaina.

<sup>7</sup>Tu omi kaliva moganediya meda anafaiweya badi vavinemiyao wananuwenuwedi be buye wanamiyaluga. Badi vevine wowokabekabebediya fa'ina yami wave'amohimohina wanahuluvedi. Omi'iyao kadu badi'iyao buye yawai-vagata Yaubada givetalaiyena-ma wanaruhagana fa'ina, vavinemiyao wanawowomumuyedi. Hidede amine wanahuluva be higa keke tamo gavadi yami ve'o'ola Yaubada againe ginalubababalimi.

### **Tobohiyamiyao agaidiya wananuwanuwa hagihagina.**

<sup>8</sup>Kafoi tobohiyakweyao, yaku nuwanuwa tabo-mo'ena fa'ina ganagahe. Nuwanuwaku moya'aimi veyao againe wanamiyami yami nuwanuwa sa'eyana. Yaubada yana yo'ogaga agaidiya wavetobohiyana fa'ina buye wanave'ahawahawahega. Tobohiyamiyao adi ayauna wana'ayaunevasedi kadu yami wanuwahobu wanahinekalikaliyedi. <sup>9</sup>Kaliva yadi koyona agaimiya keke koyona againe wanafatani, kadu yadi ihawadamana keke ihawadamana againe wanafatani. Keke medede amine wanahuluva, au badi fa'idiya wanave'o'ola be higa Yaubada ginanuwakabubuyedi. Yaubada gikovami be yana nuwakabubu wanaruhagana fa'ina, kaliva yadi koyona nuwakabubu againe wanafatana. <sup>10</sup>Meda gahe sa'eyana Veyao Tuwaina ana bukiya gidadauda gigayo,

Hai kaliva nuwanuwana  
yana wavemwamwala ginamiyami  
kadu tova yamumuna ginaruhagana,  
gilubodana be gahe koyona  
kadu fwaya ginave'edu'edyena.

<sup>11</sup> Kadu dewa koyona ginavekwaulaugena  
be gina'igibagiba yamumuna,  
ada yana wa'atufefa'ila veyao ginalelena.

<sup>12</sup> Gilubodami be hidedemi wanahuluva,  
fa'ina todewahagihagi agaidiya  
Kaiwabu matana gise-vagahina,  
kadu yadi ve'o'ola givenovenogalena,

<sup>1</sup> 3:7 Ef 5:25-30; Kl 3:19    <sup>m</sup> 3:8 Ef 4:32    <sup>n</sup> 3:9 Lo 12:17; Md 5:44; 1Te 5:15  
<sup>o</sup> 3:10 Sam 34:12-16



atu tokoyona agaidiya gilumagibou.  
 Au hidedemi tuwaina Yaubada Devida awane gigahe.

**Tamo tova yada dewa yamumuna fa'ina vita kanuhagana.**

<sup>13</sup>P<sup>13</sup>Tu ka'i tova moya'aina nuwanuwami dewa haghigagina wanamulimuliyena, au keke tamo hakwadi ginave'umagigiyemi. <sup>14</sup>Atu ka'i yami dewa haghigagina fa'ina ve'umagigi wanunuhagana digo, Yaubada vemwamwala ginavelemi. Tove'umagigi keke wanamatausedi, kadu vita fa'ina keke nuwami ginanauna. <sup>15-16</sup>7Au ase'asemiya Keliso wanave'amohimohinena, Bana yami Kaiwabu amanadi. Bana againe wahawahegemi-yo waluluve'avina. Gilubodami be yami abaluve'avina ana nuwanuwa wanahalamane-haghigagiyena be higa ka'i tamo hakwadi ginatoliluvemi ginagayo, "Gavana fa'ina Yesu againe ululuve'avina?", au amifaiweya wanamadubonalaufata haghigagina. Tu bona bikabikana againe kadu yami wawowomumu agaidiya wanabonalaufata. Kadu yami dewa wana'itave'avina be higa keke tamo vita nuwafoumiya wana'ayauneni. Au hidede amine omi Keliso yana kaliva hinagahekoyokoyomi againe, yami dewa yamumuna hina'ita-yo yadi gahe-kawowo fa'ina wowomumu hina'ayaunena. <sup>17</sup>8Ka'i yami dewa koyona fa'ina ve'umagigi wanunuhagana, au taumiyao ami vita. Tu ka'i Yaubada yana nuwanuwa againe yami dewa haghigagina fa'ina ve'umagigi wanunuhagana, medema gilubodana.

**Yesu yana alika be bafitaiso ana nuwanuwa fa'ina.**

<sup>18</sup>Wa'ita, Keliso yana dewa haghigagina tu ve'umagigi ginuhagana be omi yami dewa keke haghigagina ma yami koyona fa'ina gi'alika. Tova sa'eyanaga gi'alika be koyona fatana giluyabu-vagahina. E, yami koyona fa'ina gi'alika be higa Yaubada againe ginavega'aulemi. Wowona hiluve'alikana tu alu'aluwane wayawaina ivaguna gimimiyami. <sup>19</sup>Keliso gi'alika-yo alu'aluwana gina to'alika aluwadi agaidiya gilumamala, badi to'alika yadi abageya yogoyogonidiyao himiyami-ma kalivai-dina. <sup>20</sup>18Badi to'alikai-dina ma tuwai-mo'ena Nowa yana toveya Yaubada hidibutoyogena. Nowa waka giyogoyogona tu Yaubada yana wa'atuvefa'ila gibodaboda higa vaita mena kalivai-dina hidahagaviladi yo keke. Waka giyogona gihavaina kaliva hiyage, keke moya'aidi hidayage au eitagaga hiyage. Ilumonaita gi'adobodoboni-yo mala gituwa be waka gituwalakahini-yo badi toyage gufa againe adi kibababala hinuhagana. <sup>21-22</sup>19Mena gufai-nadi yada abaluvefota bafitaiso fa'ina, ada tova adamoya medede againe ami kibababala wanunuhagana.

P 3:13 Lo 13:3    q 3:14 Md 10:28    r 3:15-16 Kl 4:6; 1Fi 2:15    s 3:17 1Fi 2:20  
 t 3:20 Aba 7:7    u 3:21-22 Lo 6:4; Ta 3:4-5; Yo 3:5; Ef 1:20-21

Bafitaiso keke wowomi ana bwanene ana yaudihega fa'ina. Au hida bafitaiso ana nuwanuwa ma Yaubada kawonadabedabena vaita dewa koyona kavenikohiyeni-yo Bana nuwafouda ana bwanene givaihegena. Bafitaiso againe kibababala wanunuhagana fa'ina Yesu Keliso alikeya gimididi-havagi be lobameya gilaka ada Yaubada i'atagine gimimiyami tu lobama ana tovenuwa'ata kadu ana tovehimeya kadu ana tofaiwala givehivhimeyedi.

**Ka'i Keliso kanadewave'u'ulena, au ve'umagigi kananuhagana.**

**4** <sup>1</sup>Tu wa'ita, Keliso wowone ve'umagigi ginuhagana fa'ina omi meda Bana amine vita tulina tulina agaidiya wanahawahegemi. Hai kaliva wowone vita Keliso fa'ine ginuhagana, medema dewa koyona ahe givenikohiyena. <sup>2</sup>"Dewa koyona givenikohiyena fa'ina, tova adamoya be ginana alika ana maka gilubodana be hidei babiya keke tauna yana nuwanuwa ita'italuvadigana againe ginamiyami, au Yaubada yana nuwanuwa againe ginamiyami. <sup>3</sup>\*Badi Yaubada keke hidahalamaneni-ma dewa koyona tulina tulina agaidiya hihawahawahegedi amine, meda tuwaina omi wahawahegemi ma'ita lauva tunugina. Au amifata tu gihavaina. Dewai-dina ma nuwanuwa aya'ayafanina kadu ita'italuvadigana agaidiya hivetalaiyedi, gufa laulaugina ana yu-fa'ila againe hivekwavakwava, vemwamwala kwavakwavana tulina tulina agaidiya higagakahikahi, balauma adi davadava againe, udo tulina tulina agaidiya hihawahegedi. <sup>4</sup>Mena dewai-dina wavenikohiyedi be keke badi buye wadavekwavakwava fa'ina, nuwadi givegafo'uya'uya kadu hivekabu'ala'alawemi. <sup>5</sup>Tu tova mulina Yaubada matane hinamidi be yadi dewa fa'ina hinabonalaufata. Bana ana egana Tovedewayauga, ada badi aimo wayawaidi himimiyami kadu ali'alikadiyao yadi dewa ginalaufata. <sup>6</sup>ᵝGavana ana inuba badi ahe hi'alika-ma agaidiya Venuwa'ata Yamumuna ana laumamala gina? Me badi tomiyababi fa'ina yadi dewa fatana hinuhagana higa alika. Wowodi gi'alika nonogana Venuwa'ata Yamumuna adifaiweya hivenogaleni-yo alu'aluwadiya wayawai-vagahidi hinamiyami Yaubada gimiyamiya-vagata amine.

**Yaubada yana abavetala againe tobohiyadeyao kanavelugadi.**

<sup>7</sup>Kadu'e ganagahe. Gaitoma moya'aina adi abalauyabu gilurveda'ufo. Medema fa'ina wananuwanuwa-hagihagi kadu taumiyao wanahawatami be higa amifaiweya ve'o'ola againe wanahawahegemi. <sup>8</sup>Gaitoma sa'eyana giluboda-mo'em i higa buye wanave'ahawahawahega lakahina, fa'ina yami nuwanuwa hawahawahegana againe tobohiyamiyao yadi koyona amifaiweya wanaluluvetavetauna. <sup>9</sup>Keke yami wanuwalolona

v 4:1 1Fi 2:21 w 4:2 2Ko 5:15 x 4:3 Ef 2:2-3; Ta 3:3 y 4:6 Lo 6:23 z 4:7 Lo 12:9-13

au yami wa'asehawahega tobohiyamiyao wanaluve'auyedi kadu badi hinaluve'auyemi. <sup>10</sup> "Yaubada yana nuwadoga againe Alu'aluwa Mahalina yana abavetala tulina tulina omi sa'eyana sa'eyana givelemi-yo Bana fa'ine wafifaisewa. Wana'idibumuhigena be mene ami gava vehimeya Bana givelemi amine buye wanave'aveluveluga. <sup>11</sup> Wa'ita, ka'i tobohiyamiyao adi veluga fa'ina yana abavetala agaimiya lau'age amine, au gilubodami be wanalulau'age higa vaita Yaubada bona-mo'ena wadayakayahini. Ka'i yana abavetala higa ami vehimeya givelemi vaita igibagiba amine, au gilubodami be Yaubada ginafaiwalavelemi amine yami igibagiba agaidiya tobohiyamiyao waneluvelugadi. Hidede amine wanafifaisewa be higa Yesu Keliso yana veluga fa'ina yami dewa matatabuna agaidiya Yaubada ana egana wanakilakahina. Bana yana kaiwabu kadu yana faiwala ginaduva-vagata tova inaga inaga keke ana abalauyabu. Ehe hidedemi.

**Omi Keliso yana kaliva fa'ina, ve'umagigi wanunuhagana.**

<sup>12</sup> Tobohiya'ase'asekweyao, tova adamoya vita lakahi-mo'ena wa'ayaunena vaita ai gida'alahimi amine. Medema fa'ina keke wanayaulowoga vaita gava vita wadanuhagani. <sup>13</sup> Au Keliso vita lakahina giwahina amine omi wawahina fa'ina wanavemwamwala be higa yana yewa'ela ana toveya yana kaiwabu ana ivemogatala againe wanavemwamwala-mo'a. <sup>14</sup> <sup>b</sup> "Ka'i omi Keliso yana kaliva yana vevine fa'ina hinavekabu'ala'alawemi amine o yami vemwamwala gavatubuga! Fa'ina Yaubada Alu'aluwana kikaiwabuna gimiyamiyatagomi. <sup>15</sup> Ka'i waluve'alika, o ka'i wakai'afu, o mali kaliva ana mata'atuboda wasebodana, o kadu tamo dewa koyona velugana fa'ina vita wanuhagana, au taumiyao ami vita. Ada dewai-dina keke-mo'a gidalubodami. <sup>16</sup> <sup>d</sup> Atu ka'i omi Keliso yana kaliva fa'ina vita wanuhagana, keke wanawowomumu, au Keliso ana egana wawahina fa'ina Yaubada wanahawadavadavana. <sup>17</sup> Tova ahe giyemu be Yaubada kaliva ginavedewayaugida be ada laufata ginaveleda. Givebutu ide yana yo'ogaga gimidedewayaugida be higa yada nuwanuwa koyodi ginahavaina. Ide agaideya givebutu tu aimo ginanunauwena be badi Yaubada yana Venuwa'ata Yamumuna keke hidavenogaleni amanadi ginavedewayaugidi. Ka'i yana vedewayauga ide tovenogala agaideya givebutu be vita ka'ayaunena, au badi keke hidavenogala-ma aimo ginavedewayaugidi ana toveya adi vita gavatubuga! <sup>18</sup> <sup>e</sup> Meda gahe sa'eyana Veyao Tuwaina ana bukiya gidadauda gigayo,

Kaliva yegayegadiyao vita lakahina hiwahi-yo adi

<sup>a</sup> 4:10 Lo 12:6-8; 1Ko 12:4-7    <sup>b</sup> 4:14 Md 5:11    <sup>c</sup> 4:14 1Fi 2:19-20    <sup>d</sup> 4:16 Af 5:41  
<sup>e</sup> 4:18 Gah 11:31

kibababala hinanuhagana. Au gavaimi be tokoyona  
kadu badi Yaubada ana tovekwaulauga  
kibababala hidanuhagani?

<sup>19</sup>Yaku gahe dobona hidede amine.

Gaveyao vita tulina tulina hinuhagana Yaubada yana nuwanuwa  
amine, medema gilubodadi be dewa haghigagina againe hina'atuvefa'ila,  
ada alu'aluwadi adi To'aibubuna nimane hinasena be Bana  
gina'itave'avidu ahe giwonadabadaba amine.

**Fita to'ekelesiya adi tonagona yadi faisewa fa'ina gikivetuvetunudi.**

**5** <sup>1</sup>Tu omi to'ekelesiya adi tonagona agaimiya ganagahe. Omi  
tonagona meda anafaiweya iya'eku. Iya Keliso yana aulolo yana  
tagiya ana to'ita kadu aimo tova mulina yana kaiwabu ginamogatala  
ana toveya iya Bana buye anakaiwabu. <sup>2f</sup>Omi'iyao ma ami vehimeya  
Yaubada givelemi-ma fa'ina tova adamoya gagahevagadonemi. Yana sifi  
yami itave'avina againe gisedi-ma wana'itave'avi-haghigagiyedi be keke  
yami wagadibudibutoyoga, au yami wa'asehawahega wana'itave'avidu  
Yaubada nuwanuwana amine. Keke ami laufata wananuwenuwani, au  
Yaubada againe wahawahegemi fa'ina wanafifaisewa. <sup>3g</sup>Keke yami yo'o  
agaidiya wana'italakalakavemi, au yami dewa yamumuna againe aba'ita  
wanaveledi. <sup>4h</sup>Ada sifi adi To'itave'avina kikaiwabuna ginayewa'ela ana  
toveya, badau kikaiwabuna keke havahavaina wanavaina be Bana buye  
wanakaiwabu-vagata.

**Fita to'ekelesiya moya'aidi nuwahobu kadu  
vetumaganadona fa'ina gigahevagadonedi.**

<sup>5i</sup>Meda omi kabi'omiyao agaimiya ganagahe. Badi tonagona  
bonadi wanavenovenogalena. Moya'aimi yami wanuwahobu buye  
wanave'aveluveluga, fa'ina gahe sa'eyana Veyao Tuwaina ana bukiya  
gigahe gigayo,

Yaubada toselakalaka givenivenibainedi tu  
tonuwahobu giveluvelugadi.

<sup>6j</sup>Au hidedemi gigahe fa'ina taumiyao wanakivenuwahobumi Yaubada  
nimana fifiwalana againe wanasemi be higa tova gilubodana againe Bana  
ginakilakahimi. <sup>7k</sup>Gavadi gavadi fa'ina wanuwanuwa lakahina, medema  
moya'aina Yaubada againe wanavewahivedamana fa'ina tova moya'aina  
Bana gi'ita'itanuwakabubuyemi.

<sup>8l</sup>Kadu'e, taumiyao wanahawatami taumiyao wana'itave'avimi. Bawe-  
aitoga gitofotofonana vaita kaliva ginayovana be ginaluhaihaina amine,

<sup>f</sup> 5:2 Yo 21:16; Af 20:28    <sup>g</sup> 5:3 1Ti 4:12; Yo 13:14-15    <sup>h</sup> 5:4 Yo 10:11    <sup>i</sup> 5:5 Gah 3:34;  
Md 23:12    <sup>j</sup> 5:6 Fl 2:8-9    <sup>k</sup> 5:7 Md 6:25-26    <sup>l</sup> 5:8 2Ti 4:17-18; Lo 8:18

meda nibaimi Setani ginunulelemi be yami nuwanuwa yami vetumagana ginakivekoyodi. <sup>9m</sup>Au Setani wanavaga'unaunagena, yami vetumagana wanakidonena, tobohiyamiyao tovetumagana fafali moya'aina agaidiya wananuwenuwedi higa aulolo tagiya omi wawahina amine meda badi hiwahina. <sup>10n</sup>Tu vitai-dina wawahiwahidi-ma wana'ayaunena wananunauwena tu tova kabisona ginahavaidi-yo Yaubada Tauna gina'ihagihagiyemi, ase'asemi ginakivevatuna ada yami vetumagana againe ginakivetoyogimi be wanamididi-mo'a. Bana Yaubadai-nadi againe veluga tulina tulina give'inuba, ada Bana gikovami be Yesu Keliso againe wanamiyave'avina-yo Bana buye wanakaiwabu-vagata. <sup>11</sup>Bana ana egana kanakilakahina ada yana faiwala ginaduva-vagata tova inaga inaga keke ana abalauyabu. Ehe hidedemi.

### To'etoladi yana lukafoi.

<sup>12o</sup>Kafoi tobohiyakweyao, hida yami leta kabi'ona Sailosi yana veluga againe ga'etoladina, bana tobohiyada dibudibumuhigina matakuya. Au hidedemi ami lau'age. Yaubada yana nuwadoga velemo'ena fa'ina agaimiya ga'awatalatalaina. Mena yana nuwadoga wanakidonena.

<sup>13p</sup>Badi tovetumagana adi yo'o hidei melala sa'eyana wahalamanena-ma Babiloni againe yadi nuwakabubu agaimiya, badi omi buye Yaubada giluwafami amanadi. Kadu bana Maki gahawavenatunena-ma yana lukafoi. <sup>14</sup>Taumiya wanave'alulusiule againe tobohiyamiyao wana'atulauhidi be higa yami nuwanuwa hawahawahegana wanaseyemaunena. Omi moya'aimi Keliso yana kaliva yana vevine ase'asemi gina'ilova.

(Iya Fita bonaku.)